



Levetiriktum

Tana rupa ke *Stuvatum ke Crakeik tota*

(c) Damien Etcheverry

Xantof krent kan Kotava. Ewaveem daskiyin
gan Copilot TG- talpey.

Xanto : Stuvatum ke *Crakeik tota* ;
Levetiriktum (8-e otuk, 2026).

Krentara is ponara is piskura skuyuna
gan Damien Etcheverry (2026).

1-e ~ Englafa kazatota rowina

Darekeon. Ba siel, lapon van intafe birgafe gelbe, i van Almirante koe gelawaf is gaellavablif Bocas del Toro ewaleem, geolapison va Jamaika, *Crakeik* tota va ilaf ital kozwir. Marjorie Oluikya is Mulberry va bana tota dizved, nueson va inaf ord isu nilt isu vodjura.

– Va tokcoba trakul, Mulberry ?
Kazatota, gazafa tota ?

– To barnoriskafa kazatota voxe va bulitum burer. Rodaxat !!

– Ke tok vedey ? Francaf, xollandaf ?
Azen megrupena tota va nilt tic-
apter : englaf.



2-e ~ Onkara

Tuke miel, *Crakeik* tota va englafa barnorisafa tota kuranon al kaiklapir, djumageltason va inafa kelda is kasafa tuplabara. Marjorie Oluikya gruper da intafa tota tir lopon kaliafa is kotiuna nume edefiste voldrikon co yater. Nia ke englafa tota nutir Jamaika. Ina nutir gamion vajayana isen tegirapa moe azeba tir. *Crakeik* va nilt men al ticapter voxe levgon volson niarur. Va meka walzesa bulira kazawar. Kota batcoba gevar. Golara ke Mulberry tir da tota tir aotcafa, winugon kazafa voxis leve-tirikafa butcara.



3-e ~ Dominera

Gorara su tir, tcordik va *City of Bristol* englafa tota fu lavangid. Dekson tiuson, *Crakeik* tota vaon drumlapir. Dominera tir fikafa. Alub-sanoy ervo-kiraf tcordik ke Marjorie Oluikya va azeba ke volnik iped, grableson, grabluson, lubeson kan borga titbenu laloy. Englaf birelik me tid sayakik, tanoy inaf fayik abaltason abduvulter enide va Malouin di tsuner, i va crakef francaf tcordik zanon gu Marjorie Oluikya. Moe abduefa azeba ke *City of Bristol* tota, busumayan levetiriktum keve kiwast tander.



4-e ~ Kalcenera va englik

Doaliera al tir tizafa vox tcilafa, konak xonukik tid, i nelkon englik, is konak bakanik viltayan ok abaltayan. Cenenik va ervo gu Malouin is tcordik-tum al titmimad nume mirembon gu sin tid. Mo ciska va englaf redakik ton keraf redakik al vangir aze abalt-dratceson gir. Kalcenera tir. I warzafa sega ke gazikya ke tcordikeem ke Kariba bira !



5-e ~ Krizafa kosmara

Gemelt ke kosmara va kulaceem ke vaj ke *City of Bristol* tota mu Marjorie Oluikya berde tir. Kosmara va inaf kaip ? Best zo fenkur, vane walazeba dem omaf pij, orikafa is alitasa is vrotsondafa is fordafa. Numen to lemistera tir ! Jontik sanoy ebeltaf levetirik koeon zo flavayad ise zo busumayad, ton vuda is faxuca keve gexata. Mulberry oveyer, bata tota en tir levetirikafa tota ! Marjorie gan volayafa kosmana disukexa zo romplekur. Barkley englaf redakik tcalogron kicegar : ayikafa butcara anton tir tana kazafa apta milafa gu kotara.



6-e ~ Englik zo kobusumad

Ki ke englaf drig su zo kobusumar. To sinaf siluk grupeteson va daava ke stolera. Va intafi titisi bali vol rietad. Kas flioton fu zo klibud, oke ko bira fu zo divkabud ise pu ricol fu zo bilded, oke mo kono letafo xo fu zo jovled ? Kore tcordafa redakikya vanyer burdamafa, pune batcoba va inafa titisa gorara vol abdiyer. Marjorie Oluikya ant fu gogorar, gruper. Icde bali ke engliktum vox me anton.



7-e ~ Levetirik kareizud

Ina va levetiriktumam gu walazeba volmiv su malnarir, i va baroye ayikye is tanoya ayikya tisa kireptafa loon dam milbaliik ware vudepes. Sin va busum su mbi tunuyad. Lantanye yoltkirafe gu Obango abicote englavur, tiyir rem-trakusik abdi bakonera. Va sinafa izva kareizur, va gralomera is rezgalera is relkafa koyara is vordavara is udutura ke englaf drig. Marjorie Oluikya kal-terektar, lasunarur, va sinafa stekeugal under, i va stekeugal merotitis dim-lapira ko Afrika.



8-e ~ Toka nuyuca ?

Ina va ant Mulberry ropomasi va gorara rozinular.

– Inc rabatel, oveyé, bana tota enwe tir ta levetirikafa butcara, i *City of Bristol*. Sin va min to batdume me buliyid kiren buli kou walazeba ta ika-rundara va ayikaf prostak zo deswayad. Va inafa totaneva su rupé, 220 levetirik koe Ouidah koe Afrika zo kototayad, 200 ayikye is 20 ayikya, aze arinton ixam ant 170 wan rembliyd. 50 bak koyara awalkeyed aze pu ricol zo div-kabuyud, ~ ini su pintar.



— Tok yolt ke inaf ikudas redakik tir ? ~ ina erur.

— Barkley, ke Boston. Voxen ageltucaf ropiilasik va vaj tir Nicholas Lawes.

— Bowesik va Jamaika, i Guazikye ?

— Miv bantan.

— Englik tid tel lorotaf cos ke Tawava. Culimed da va sinafa mwa me malaskit, voxe int va meka mwa ke Lorik enwe malaskid ! Minafa Eirea leve sinafa miremba isu volmalyaf gakes mwatum awalker, isen dace batlize va min dun onkad ise vol saad. Tokdume va sin co gotarkat ? Meviele, mevielu !

— Goxe folí da va Eirea mevielu gin witit, voxe batlize koe Kariba bira va sin olgapon rovordavat.

— Gue, to goni mu vo tir.

— Va rin al vruzá... koe Nantes, to ixam jontikedje.

— Vaxe levetirik, tok arak ke vaj tir ?

— Koe yultxo, titeon, jontika flecada tir, vas moava koe dolebela ke Curaçao vodar, va tufacka malseotatat. Tapleku ke fad dere tid, bancoba dere tir dulapasa. Ede konviele va tcordikeba co gojovlé ise moe siday co irubá, pune co djutevanpí fadmidusik, ~ Mulberry welidar.

— Toktan rogruper ? Voxen kaliukuca taneon tir tunuyara va bat kimtaf afrikiktum, i va tel wan moblis. Voxen tokliz ? Den englik ok francik ok xollandik voxok espanik, sin kotliz gire zo tulevetiratad. Va intafo vo mevielu gin witid, int dere. Wori, to va diza fu askit : va Kaukira wida, setikel, kene govitafa krimta ke indiafa patecta isu Zambo fu kallapit. Banlize Kawanu okilik va sinafa nuyafa koirubara lev-rictatar, sin va kona guinera mea kivatad. Lorik va sin kopomatar.

— Me grupé kase ovel voxen batinde jupatat.

9-e ~ Van Kaukira

Crakeik tota isu *Dromore voik* (dikis va warzaf yolt zilukeyen pu *City of Bristol* tota gralomeyena gan Marjorie Oluikya az banvielu vandositasa) plus va tcordikaf nilt, va patcetolafa Kaukira wida wison artlapid. *Crakeik* tota va kaliukafa dimempara golde astirbaf voy moi zivotccek to banlize al kazawayar isen Marjorie Oluikya gu Kawanu okilik al fineyer. Ban in is konak milgreltik moe omega tigid, me tid guyaf, gruped da bat tcordik tid nik.



10-e ~ Levetirik mo siday

Nuyuca pu levetirik zo dimzilir. Sin koe to nuyafa patecta goremblitid ise va warzaf direkeugal gogandutud, i koe patectolafo cosxo ke Kawanu, vanpitiso Zambo patecta. Va kustofa tota sol-tawayasa il vofa Afrika, kan likay bulud. Marjorie Oluikya is Kawanu va do-trakura gire kuecad, i va do-trakura dem dirnura is milbava. Ina kalir da inu va englik fu gorodaxar kiren ban sin kotkase fu pid ise va intyon « bonol » fu ladimnarid, i va korikaj dikis va meka lidopa mei bos.



11-e ~ Tigara va levetirevik

To englaf stolenik re zo divtotad. Voxen battomon, liza volto mo ved-gobes siday tir, vols to mo letafa ewala, dem biwe abica iskena eksa. Sin va Lorik is inafa segayera govebliketed ! Levetirevaf Barkley redakik kabdue bira zo vrayayar, wetce tula. Marjorie Oluikya illapir ise jovler, voldisukeson va ban rotapsaniktum. Inya is intaf tcordiktum me tid « agralaf namulol », mekonovenon gikoilkad, neken butcara va ayik va sin vuilerser.



12-e ~ Azen batvielu ?

Crakeik tota isu *Dromore voik* stedan gan tcordikaf drig ke Marjorie Oluikya va ticawaltaxo re vanlapid. Sinafo artexo : xollandafa Curaçao ewala lize kulaf flecadaf vaj koilkayan bas englaf levetirevik, va narasik vanmiau yudaf xollandaf kazasiktum tis aptacik ika dronyo trasitir. To porafa kazara tir, bana. Voxen ilikatcuson va miv nelkot ke levetirikafa butcara, Marjorie Oluikya gruper da europaf vedeyeem is sinaf gejatoteem kev dalint batvielu titid.

